

全華叢書

全華叢書

詩律武庫卷五

宋呂祖謙撰

郡後學胡鳳丹月樵校梓

仙道門

三洗髓

太平廣記東方朔元封中嘗遊洪濛之澤忽遇一老
母採藥於北海之濱俄而有黃眉翁指母以告朔曰
昔爲吾妻托形於太白之精今汝亦此星之精吾卻
食吞氣已九千餘年目中童子皆有青光能見幽隱
之物三千年一返骨洗髓二千年一剝皮伐毛吾生

來三洗髓矣坡詩至道終當三洗髓

王母謠

穆天子傳穆王西征至崑崙丘見西王母與之觴於
瑤池之上王母爲天子謠曰白雲在天山陵自出道
里遙遠山川間之將子无死尙能復見天子答曰予
歸東土和洽諸夏萬民平均吾顧見汝比及三年將
復而野杜詩惜哉瑤池飲日宴崑崙丘

羨門子

羨門名子高古仙人也紫陽真人周義山入蒙山遇

羨門子乘白鹿執羽蓋佩青旄之節侍從玉女十餘人義山再拜叩頭乞長生要訣羨門子曰子名在丹臺玉室何憂不仙坡送張安道詩有我公古仙道超然羨門姿是也

王知遠

神仙傳王知遠母初夢靈鳳集因而有娠僧寶誌曰若生子當爲神仙宗伯遂生知遠其後謂弟子曰吾漸遊洞府仙曹除吾爲少室仙伯

園客五色蛾

園客者濟陰人常種五色香草積十年報其實一日
有五色蛾止其旁客收而蓄之至蠶時有女夜半至
自稱客妻道蠶之狀客與俱蠶得一百二十頭繭皆
如甕每繅一頭六十日乃盡遂俱仙去故坡詩云宜
蠶使汝繭如甕又云扶桑有繭如甕盜天女織梭銀
漢上

三茅君

仙經云潤州句容縣勾曲山卽三十六洞天之第八
洞名曰華陽洞天卽三茅君之所治也大茅君名盈

次茅名固小茅名衷太上拜盈爲司命真君固爲定
錄真君衷爲保命真君坡詩誤入華陽洞竊飲茅君
酒是也此山卽今茅山也

舉手謝時人

劉向列仙傳王子喬周靈王太子晉也好吹笙作鳳
鳴遊伊洛之間道士浮丘公接上嵩山三十餘年後
於山上告柏梁曰告我家七月七日待我於緱氏山
頭果乘白鶴駐山頭人望之不得到但見舉手謝時
人而去故孫綽天台賦云王喬控鶴以冲天又胡曾

詠史詩云借問吹笙王子晉定從何處上青冥

吹簫作鳳鳴

蕭史秦時人善吹簫穆公以女弄玉妻焉教弄玉吹簫作鳳鳴於是鳳凰來止其屋公爲作鳳臺使居其上
一旦夫妻乘鳳翼而仙去故坡詩有不慚弄玉騎丹鳳之句

嫦娥竊藥

嫦娥者羿妻也羿得不死之藥於西王母嫦娥竊之以奔月窟遂託身月中故月有蟾蜍之象焉韓愈作

毛穎傳戲言飄竊嫦娥騎蟾蜍而坡有應逐嫦娥駕
老蟾之句

神遊八極

莊子伯昏無人曰夫至人者上窺青天天下潛黃淵麾
斥八極神氣不變故李白大鵬賦序云余昔於江陵
見天台司馬子微謂予有仙風道骨可與神遊八極
之表故東坡題太白真云謫仙非謫乃其遊麾斥八
極隘九州又送楊傑遊太山絕頂有神遊八極萬緣
虛皆用此

摩挲銅人

東漢薊子訓有百歲翁自說兒童時見子訓於市顏
色不異於今後有人復於長安東霸城見之與一老
翁共摩挲銅人相謂曰適見鑄此銅人不覺已近五
百歲矣故坡贈梁道人詩有笑看金狄手摩挲之句
交梨火棗

眞誥載玄英夫人答許長史書云玉醴金漿交梨火
棗乃飛騰之藥二樹欲生君心猶有荆棘君侯若能
剪除荆棘絕去人我泯此是非則二樹生君心矣亦

能開花結實葉茂枝繁食之一枚則景光萬里也故
坡與蹇道士詩有寸田滿荆棘梨棗無從生之句

寸田尺宅

寸田尺宅出黃庭經以喻理生也兩眉間爲上丹田
心爲絳宮田臍下三寸爲下丹田又道家以面爲尺
宅故坡與王仲素詩云尺宅自足庇寸田有餘畦又
遊羅浮云玉堂金馬久流落寸田尺宅今誰耕大抵
皆言修養之事也

芝田蕙圃

王子年拾遺記云崑崙山有瑤臺十二層各廣千步地皆五色至第九層有芝田蕙圃盡仙人種植又神仙傳崑崙第二級曰玄圃又曰積石瑤房又曰閼風臺又曰華蓋又曰天柱皆神仙所居之地

與汗漫期

淮南子云盧敖遊乎北海遇一善士深目而結喉鳶肩而修頸豐上而殺下踞龜殼而食蛤蟹謂敖曰吾與汗漫期於九垓之外不可以久留掉臂而聳身遂入雲中敖自謂觀乎六合之外及見其如此乃嘆曰

吾比夫子猶黃鵠之與壤蟲不亦悲乎哉故坡有盧
子不須從善士之句

棗大如瓜

漢書李少君與武帝曰臣嘗遊於海上見安期生食
棗其大如瓜故坡云今年東海棗如瓜又云親授棗
如瓜

金華牧羊

黃初平少時牧羊於山中有道士見其良謹將至金
華山四十餘年其兄初起尋得之問曰羊何在初平

曰近在山東乃俱往視之見白石無數初平叱之白石皆起成羊萬餘頭後易姓名爲赤松子故坡詩有問羊不向金華去之句

孫登長嘯

晉阮籍傳籍嘗於蘇門山遇孫登與商略終古及栖神導氣之術登皆不應因長嘯而退至半嶺間有聲若鸞鳳之音響振岳谷乃登嘯也杜詩有誰爲蘇門嘯庶作梁父吟諸葛亮嘗爲梁父吟故云

雲錦囊

漢武帝內傳帝見西王母巾箱中有卷小書盛以紫錦囊帝問此何書曰此五嶽真形圖也其文祕禁卽令侍女宋虛賓探囊懷中得一卷以雲錦囊盛之因以授帝坡詩盛以丹錦囊冒以青霞裾

西王母

清淨經注王母乃九靈太妙龜山金母也元始授以九光之籙使統括眞聖制召萬靈故凡登仙得道者咸錄焉所居宮闕在龜山西那之都有城千里玉樓十二瓊華之闕紫翠丹房左帶瑤池右環翠水坐連

琳彩帳有少容戴華勝佩虎章又云王母乃東皇木
公之配焉

青鳥

山海經三危之山有青鳥居之主爲西王母取食故棲
息此山漢武帝內傳云七月七日於承華殿齋坐忽
有一鳥從西方來集殿庭上問東方朔朔曰此乃西
王母欲來也頃之王母至乘紫雲之輦履立瓊之舄
有一青鳥似鳥挾侍王母傍王母下輦升殿見帝命
侍女許飛瓊鼓雲和之瑟故司馬相如大人賦云吾

乃今日觀西王母鬢然白首戴勝而穴處兮亦幸有
三足之烏爲之使也張揖注云西王母其狀如人豹
尾虎首蓬髮鬢然白首

赤城居士

唐司馬承禎字子微隱居天台之赤城玉雲峯自號
赤城居士號白雲子年百餘歲將終謂其弟子曰吾
爲東海青童所召乃蟬蛻而去初蜀有女真謝自然
欲過海求師於蓬萊至海中船爲風飄到一山見人
謂曰蓬萊隔弱水三十萬里非飛仙不可到天台有